

# **KERUSI RODA SEMARAKKAN IMPIAN YAHYA GENGGAM IJAZAH SAINS KOMPUTER**

**18 November 2015**

**- Utusan Online**



*YAHYA JAHAWI berkerusi roda ketika menerima ijazah yang disampaikan oleh Abdul Taib Mahmud dalam Majlis Konvokesyen Unimas Ke-19 di Arena Gemilang DeTAR Putra, Kota Samarahan, Sarawak, semalam. utusan/MOHAMAD GUSTIE*

.KOTA SAMARAHAN 17 Nov. – Menghidap penyakit folio yang menyebabkan pergerakannya terpaksa bergantung kepada kerusi roda tidak sesekali mematahkan semangat Yahya Jahawi, 29, untuk melanjutkan pengajian ke Universiti Malaysia Sarawak (Unimas).

Setelah empat tahun menimba ilmu di menara gading, hari ini mencatatkan kenangan cukup manis bagi graduan orang kurang upaya (OKU) dari Fakulti Sains Komputer dan Teknologi Maklumat (FSKTM) itu apabila menerima ijazah yang disampaikan oleh Yang Dipertua Negeri merangkap Canselor Unimas, Tun Abdul Taib Mahmud. Yahya yang ditemani ibunya, Dara Ebrahim, 69, dan abangnya, Marzuki Jahawi, 42, ketika ditemui memberitahu, kekurangan diri bukan halangan kepada golongan OKU untuk berjaya seperti insan normal yang lain, asalkan mereka tidak kenal erti berputus asa serta tidak mendengar kata-kata negatif yang dilemparkan kepada mereka.

“Inilah yang menjadi pegangan saya selama ini. Keinginan untuk berjaya sentiasa membara dalam diri menyebabkan saya sentiasa fokus dalam apa jua yang saya lakukan,” kata anak bongsu daripada lima beradik berasal dari Miri itu.

Anak pesara polis itu berkata, kejayaan yang dicapai adalah berkat dorongan ibu bapa, keluarga, pensyarah dan rakan yang banyak membantu sepanjang dia menimba ilmu. Sementara itu, graduan Kejuruteraan Mekanikal dan Pembuatan, Mohd. Rahmat A. Rahman, 23, pula berkata, kehidupan susah yang dilalui sebagai anak Felda menjadi azimat yang mendorong kepada kejayaannya. Anak kelahiran Johor ini berkata, penglibatan aktif dalam pelbagai aktiviti sepanjang bergelar pelajar di Unimas juga tidak menjadi masalah kepada untuk mencatatkan

keputusan baik dalam setiap semester. "Sepanjang pengajian lapan semester, saya berjaya mendapat Anugerah Dekan sebanyak tiga kali. "Saya pernah diberi mandat sebagai Naib Yang Dipertua Majlis Perwakilan Pelajar bagi sesi 2013/2014 dan memegang jawatan sebagai Timbalan Presiden bagi persatuan pelajar, The Institution Of Engineers Malaysia (IEM) Safe Unimas Student Section bagi sesi 2012/2013 di Fakulti Kejuruteraan," katanya.

Selain itu, katanya, dia juga gemar melibatkan diri dalam bidang kesenian dan kebudayaan di dalam serta luar kampus seperti tarian, muzik tradisional, pasukan orkestra dan koir. Menurutnya, dia pernah mengharumkan nama Fakulti Kejuruteraan sekali gus menaikkan nama Unimas dengan memenangi Anugerah Perak sempena Pameran dan Inovasi Kejuruteraan Antarabangsa (I-ENVEX) yang diadakan di Universiti Malaysia Perlis tahun ini. -